

四庫全書

集部

欽定四庫全書

集部

北郭集卷六

四至

詳校官庶吉士_臣李傳熊

中書_臣劉源溥覆勘

總校官知縣_臣楊懋珩

校對官編修_臣盧遂

謄錄監生_臣趙廷璋

欽定四庫全書

北郭集卷四

五言律

雨後過桃花塢

林晚帶城陰，斜光里巷深。
過時思燕賞，感物廢行吟。
暫出畦間蝶，將棲柳外禽。
亂離雖有恨，能到亦娛心。

詠隣家桃花

明 徐賁 撰

綺樹隔園隣牆陰得見春艷香還可挹芳質未容親賴
有情勾蝶羞無語向人靈源纔咫尺不用覓通津

謔柳

裊裊復垂垂千絲更萬絲枝殘離別處花落艷陽時泣
雨愁多眼紫烟誤學眉龍池看更好洛水種偏宜

經廢永定寺寄謝元功

路轉廢垣邊依依市井連院荒晴見蝶僧出午無烟古
佛存唐像殘碑記宋年自悲人境異此地更蕭然

與高季迪宿丁志剛宅次韵

貶遠歸方喜交深見愈親
戀詩留兩日醉酒記三人
竹密梢禁雨梅高蕊應春
論心元有素不用再相陳

夜投白蓮寺

在甫里

飲別東家叟行投西寺僧
無風收閣幔有月罷廊燈
竹夜聲偏集池寒色似凝
無端值詩景清興覺逾增

黃山人家次韻荅陳秀才

相逢坐上客俱是此鄉人
重見兵前面能全竄後身
月

遲疑夜短風乍覺寒新為訴窮途事都忘語意頻

題張來儀畫次韻高季迪

萬水更千岑朝晴又暮陰
援聲風出樹虎跡雪團林
酒具遊曾遍詩材思更深
相看畫中客不異共行吟

和陶文學月夜泛湖之作

水色浩無涯乘舟學泛槎
澄河天合影遠浪月浮花
夜暗丹楓浦秋明白鷺沙
懽情猶未已還復過隣家

送宋天章歸南康葬親

道路經千里風塵過十年遺阡寒草外故墅夕陽邊去
買臨江艇歸求負郭田遙知葬親處雙鶴吊秋烟

題王嘉主簿母夫人李氏墓銘後

蚤歲傳貞節名家出令儀萱堂宜享壽蒿里忽成悲子
哭雷鳴夜人看露降時西亭墓前樹爭為護新枝

過東園有感

閒步林中屨來敲月下門雲陰平亂堞烟景聚荒園近
晚蟲逾切當秋菊自繁誰能忘感慨到此不銷魂

與金文中朱仲義宋仲溫過李士明鍊師雨阻留
宿探韻得孤字師有酒瓢如鶴形因扁居曰鶴瓢

山房

齋房留坐久寒雨灑庭隅筵促蘭香近池空桂影孤酒
瓢憐似鶴蠟屐恨非鳬雖阻還家興清言亦可娛

寄衍書記

聞道歸來日空山獨寄禪施經村口市澣衲石根泉竹
色林扉掩雲深草閣連秋風苦相憶空托下方緣

對鏡

把鏡忽成悲，衰顏獨對時。
風塵空老我，勲業竟煩誰。
乍見如曾識，頻看卻又疑。
黃冠初欲試，短髮可相宜。

雨中過陳秀才宅

一逕來東崦，茅堂竹映扉。
鶯聲寒尚少，樵響午猶稀。
苔雨漫棋局，蘿風入桁衣。
愛君能賞靜，纔到便忘歸。

兵後過畢亭山

畢亭西去遠，一過一淒然。
鴈宿蘆中月，人歸草際烟。
漁

家多近水戎壘半侵田尚喜餘民在停舟問昔年

題關氏廢園

園景正蕭然那當雨後天花臺曾置酒蓮港卻通船水
涸橋仍構畦荒路漸連如何遊賞日不在未兵年

晏起

高臥齋房靜悠悠雞唱殘空明窻易曉日出帳仍寒謝
事容身懶甘貧任路難不妨教宴起幸得此時安

中秋

圓月秋方皎涼天夜逾澄杯憐娼女勸樓看美人登皓
氣浮金界遙光轉玉繩綠鸞招不下簫管竟無憑

同衍師訪席有道分韻得尋字又得無字

邂逅空門友仙家得共尋石苔經屐破冰溜落溪深雲
過松分影林寒鶴避陰何煩謝人世心靜只山林

其二

村深一逕遠幽鳥喜相呼心與天光靜身兼鶴影孤雨
苔隨地有木葉過霜無為問蓬壺客何年種白榆

過妙智院臨西澗望海虞諸山得塵字

來問東林社行吟西澗濱
水痕秋更淺山色雨如新
落木無棲鳥扁舟有去人
欲因尋石室深愧客衣塵

喜王介休過次韻

喜爾頻來往敲門每夕曛
迴風偏入幙高樹偏留雲
激石灘聲轉投沙鴈字分
自慙疎懶性不是厭塵氛

同黃本中山人衍畧二釋子會宿桐里寶師房

小艇泊江潯同來宿梵林
雨香茶榻起烟影竹垣深
幸

得芳時見寧辭醉後吟歡娛當此夕亦足慰離心

題金山幽居

君家住橫塘繞屋盡垂楊遙山多雨意平野足風光蟄
後童尋笋蠶時婦採桑閒中無別事應只類醫方

虞文學村居

行盡沙村路林塘得隱居竹光琴席上蓮氣酒杯餘露
重時聞鶴風平或見魚會當明月夜相與步前除

藥圃

高樹草堂陰林蹊繞澗潄三稜收夏草五葉認春參畦
上風香禰泉頭土脉深應知扣門者多是病家尋

蝶

化從微蠹出生與衆蜂忙冒雨仍調舞因風得恣狂獨
憐花下影遙識酒邊香失意驚羅扇含情戀繡床

賦得洗藥贈張性之提舉

携將一藥筐浣濯向迴塘根蒞泥難淨苗新爪易傷曝
時猶帶濕浸處尚流香聞爾勤脩製多應按古方

遊靈鷲寺 在吳城

香林竹樹踈靈鷲古僧居淨几陳齋器名函貯梵書澍
觀諸相外幽詠六時餘每到成清坐塵根亦自除

約李伯章宿浩師房不赴明日因寄

舊有通家好都來老大時喜當蕭寺見恨阻夜窻期城
隄星河逼陂乾草樹哀無因慰懷抱聊爾為題詩

姚生家菊窻

黃花近間白疊疊獻秋妍佳色虛櫺映寒香小牖傳交

芳同結綺並巧闢連錢來往無煩問相看自可憐

喜許孝廉見過賦此以謝

每負尋君約翻令載酒過青山閒對客白髮醉宜歌棹
響蘆間亂禽聲桂裏多無端趣歸去今暝奈愁何

次韻如律侍者

蚤悟空門學迷津得濟涯逢人談淨業邀伴結長齋瓶
古泉滋瑩杯香茗味佳定知趺坐外別自有吟懷

次韻顧浩知客

禪關臨九市喧寂此中分寶石棲嵐影珠林帶夕曛花
間時禮塔鶴上每招雲空界多詩景幽吟盡屬君

寄贈李道士

學仙不離世遠地構齋房簷蔓為衣桁山瓢當酒觴飯
甘麻有味漿熟桂多香一自相違後雲壑望更長

李逸人同川藥隱

小墅離村遠門當水竹開芷蒲皆藥草雲鳥盡詩材春
雨躬耕去斜陽訪病回花藏溪上路只許酒船來

宴王允同雅會堂用外舅韻

東風奏絃筦開宴錦堂深
酒氣酣春色桐香落午陰
花殘惟駐萼鶯老尚調音
感此頻懷舊因傷久別心

題春江雲舍

含遠深藏樹沙虛暗宿雲
春江孤艇渡村逕幾家分出
澗泉皆雨當門草是芸花時
重作約載酒此逢君

題逸人西居

小逕入幽林齋房住更深
廢垣花蔓葛荒園草迷參藏

帖存家業脩方寓道心幾回舟過處柳下記相尋

夜坐池上有詠

新涼滿綠波
窻戶雨纔過
岸響聞蒲葦
池香識芰荷
隔雲星現少
承月露凝多
夜靜誰能到
詩成只自哦

問謀佺二上人病

出世歸來早
蕭然一古僧
色身因病惱
道念與年增
花塔留孤錫
松房置七燈
遙知幽詠處
野色望中凝

其二

已斷遊方念天寒獨閉房禪期多疾廢經誦老年忘几
上惟香具龕前有藥囊鄉人皆敬愛無不餽新方

泛碧浪湖

在湖州南門外

邀客泛流槎開樽對觀沙
苧袍沾杏雨蘭棹撥蘋花
積水添湖滿遙山抱郭斜
閒情遂幽賞聊用答年華

遊浮玉山

在碧浪湖中次韻

浮玉山前路樓船泊渚沙
蘋香風際草杏色雨前花
閒鳥兼湖淨游絲起岸斜
不因來此處那得賞春華

晚過西崦費氏別業贈明天目長老

烟光暗墟落澗道入層層不訪中林士那逢西崦僧
山厨將具黍隣屋為分燈自覺行來倦清談遠弗勝

一身

一身經喪亂此地獲偷安羽檄今朝急征輦幾夜寒
遠峰明或近新月淡如殘雖有樽中酒離懷不自寬

宿彭閣

溪流處處通舟出野橋東小閣雲停雨開門竹掩風
僧

迎先問候客至只談空不道經離亂清溪得此同

晚行南岷懷陳文度

離思滿荒烟行行只自憐吟成流水次望斷遠鷗邊葉
戀經寒樹星摧欲夜天懷君無數里渾似隔山川

夜行東湖

葭莢連湖道新寒夜更清波搖星失影風過鴈流聲估
舶依村宿畸人傍水行棹歌何處起杳渺不勝情

山館喜黃校理莫先輩見過

為客荒齋夜相過喜見君酒盃令僕進厨火向隣分歸
計貧難定愁言醉可聞無由免流落歸卧故山雲

蜀山書舍圖

山水幽深處閒居此地曾傍花春宴客看竹午逢僧雲
樹尋新咏巖巒憶舊登兵塵今間阻對畫思難勝

己酉八月十七日夜泛碧浪湖泊浮玉山對月呈
席上諸公

水月共秋妍山椒夜泊船人來黃葉浦漁宿白鷗天聞

唱風濶外持盃露影前自從經喪亂誰得此留連

期萬僉憲杜進士徐校理游張林山

東風半寥落遊賞已蹉跎春色邀人醉歡情待妓歌
花愁經雨少鶯語在山多預作明朝約寧辭載酒過

贈山中隱者

居久辭簪紱蕭然世外心壺成師授藥囊積自燒金
長嘯千峰表閒行百澗潄猶嫌樵牧到更欲住雲深

寄道場長老渭清遠

逍遙佛境居性相自如如說法神龍衛傳經寶象輿乳
花香積供貝葉梵天書一自遊方後春來出寺踈

蓮花涇莊

洲渚綠紫迴菱荷面面開路從花外過山向柳間來鳴
鷺驚迴舫遊魚仰酌杯同為城郭裏此地絕塵埃

閒居

遠近兼山水閒居得野情踰垣驚竄鹿出樹見啼鶯藥
園泉邊闢瓜田雨裏耕喜無冠冕志因得少逢迎

題周伯陽所居

山深獨置家地帶竹林斜
花盡纔收蜜烟生正焙茶
客來門放屨樵出路鳴車
不但成高隱營生亦有涯

題趙道士山居

閒心與世忘遠住白雲鄉
種玉旋開地藏丹別置房
禽魚各有樂椒桂本同芳
已謝來轅久從教徑路荒

山中琴興

巖上露初霽旭日照高林
古澗雲蘿窈孤亭松桂深
鳴

琴始成調流水復同音為問山中客誰知靜者心

黃山梓里

山中多豫章門巷綠成行晴日花明夏南風葉汎涼密
陰同岸杞遠色並畦桑望望林泉處君家有草堂

登東林塔

孤峯元絕漢層塔更凌空輪相超三界鈴音韻八風烟
蘿登已盡雲水望何窮自喜身強健來居杳靄中

馮山人湖上別業

宅近南湖口青山盡在門田卑嘗冒水隣少不成村住
久諳農事耽閒悟道言如君避地者今有幾家存

答胡勉秀才

採蘭不可度悵望暮江舉湖勢歸還疾鳶聲飛尚高曲
憐琴上怨人憶酒中豪莫謂天涯遠題詩豈憚勞

思親亭

孤亭碧澗潄長日此登臨每到看雲處都成憶母心壽
萱春自綠慈竹夏多陰不為閒瞻咏惟歌遊子吟

送湯伯貞之京

曉日轉城鴉驅馳陌上車身雖居道路心已戀京華
龍樹蕭蕭葉河流混混沙到時春爛漫開遍上林花

送思上人

一瓶與一錫遊越復遊吳到寺長逢舊看山每過湖飯
緣隨處有法意本來無南地多猿鳥還驚梵語殊

詠鷗得苗字

下上及流潮尋盟不待招羣飛分嶼色獨宿隱蒲苗晴

影沉江小春聲泛渚遙自嗟江海客短髮共蕭蕭

送張文學

芳筵趣新餞商館默秋聲淡淡川星沒遙遙海鴈征維
舟延客景看路計歸程以此遲留意聊將暢別情

詠妓

出閣初含笑臨筵復理粧蘭膏分髻綠葢粉間眉黃掩
扇羞嗔小褰衣舞恨長不知坐中客若箇是盧郎

贈虛中上人

歸去東林寺行尋曲澗流餘燈因佛在宿飯為猿留竹
屋烟迎夕菱池雨送秋還叅衆師舊一一話曾遊

送江教諭

湖海相知少風塵送客初歸愁江雨積別意柳條踈楓
落迎船葉鱸香出水魚吳興尚文物吾道近何如

送烏程馮明府

夙負親人術初當出宰年青山依縣郭春雨傍湖田鳥
下鳴琴後花飛判筆前民風非復古重作諭蒙篇

濯清軒

春草綠芳洲清江繞舍流
芹香低渚燕波影媚沙鷗
風帶初聞笛花藏罷釣舟
滄浪千古意何處問巢由

書上逢董莊

董吳城北郭故隣

五月苕溪道南風暑氣新
偶當為客日翻比在鄉親
醉酒橋邊市驅車陌上塵
行藏不須問同是布衣人

賦得廣文舍贈李文學

地與齊宮接門臨泮水開
廣文騎馬到司業送錢來
芹

向春時采槐多亂後栽無種不須歎相遇且啣盃

悼陸廷臣

溪館相逢日荒山獨吊時文章傳舊業泉石負幽期反
隕慈親淚空遺幼女悲交游今滿眼題墓欲煩誰

楊進士載酒亭卷

亭基久蕪沒湖上幾斜曛舊夢通魚鳥餘情付水雲客
過曾問字詩罷憶書裙待得重歸隱春風此訪君

秋晚次高推官韻

溪樓成晚眺沙浦粲孤霞值節長為客逢人即話家荒
山惟去鳥落木見棲鴉莫謾嗟零落吾生豈繫爪

送客

津亭鳴鼓罷行色柳先知酒到聽歌歇詩因戀別遲亂
山投驛晚足馬扣門時草檄軍中事多應載筆隨

立秋夜同社書記李逸人寓宿分韻得霜字

今夕秋風至相逢酒一觴身雖俱在客情得是同鄉密
竹先驚雨輕梧不待霜那知千里外復此話連床

秦淮客舍除夕呈大兄

兄弟喜連床燈前話故鄉年隨窻雪盡夜入酒盃長暫
得懽情合都將客況忘何如共歸去爛醉北城傍

戊申正月試筆

佳氣麗層城龍河溢曉清市橋緹騎集巷陌寶車行柳
上春多思蘭心雪有情風光看更好底事客愁生

次韻楊孟載感故園池閣

四首

草閣開清曉鈎簾爽氣通綠蒲藏藥裏文符縛詩筒盃

手繞臨澗梳頭得面風此時應得暇行繞碧梧桐

其二

草閣開清晝官閒過客多枕材便礪石酒具給池荷蕉
長宜聽雨萍交不見波此時晴爛熳歌詠復如何

其三

草閣開清晚涼生自有期菊因風始護竹待雨方移妓
進調成瑟童收奕罷棋此時盃酒裏明月是相知

其四

草閣開清夜垂垂星斗零水蒲藏白小露草宿蜻蜓文
梓裁憑几生綃畫卧屏此時涼似水看子拾流螢

茅堂

茅堂近曲岡門巷草萊長病力晨春怯詩情午睡妨相
過皆故友忘却在他鄉炎夏愁卑濕時時理藥囊

獨坐懷鄉中友人

獨坐荒山暮相親是酒盃人從鄉裏別秋在客中來倦
鳥須臾去幽花次第開離心自多感不為歲時催

挽郭秉心都事

謫居欣與識死別忽成悲客館存虛位行囊只舊詩鄉人收骨葬館僕報家知惆悵平生淚因君更復垂

趙曹莫三助教留宿南齋

南齋涼意足夜景滿柴關隣友將茶送山人酌酒還星垂雲影外螢出桂陰間相值艱難日諸君豈易閒

次韻別方員外

暫來因復去不得久相同身在匆匆裏年過袞袞中吟

斜寒寺日望斷暮天鴻料我還山日相思只向東

送潘士謙歸廬州省親

微名雖不偶且得奉慈親為客逢多難還鄉有幾人
鷺江郭雨桑棗楚郊春此去尋閭里俱非舊識鄰

賦荷送陳進士啟

團團初貼水苒苒漸盈塘微動知魚戲斜披見鷺藏
幅裁巾學製筒泛酒移香折得同青蓋貽君障夕陽

賦陌上車送穆德敬

徒旅候鷄鳴驅車陌上行
益當寒樹影鐸應曉風清
軋軋趨前坂遙遙計後程
雙輪日千轉未足比離情

送王員外歸太原省墓

聖主頒恩寵郎官賜誥還人瞻新騎從馬識舊家山
古墓原花裏高墳隴樹間遙知心戀闕夜夜夢朝班

送曾伯滋赴西河將幕

上將初分閫儒官解習兵
風旗春獵野雪帳夜歸營
洮水從岷下祈山入壠平
知公能載筆草檄報邊聲

送澄上人南遊

雲水三千里江湖二十年春風投海國落日上吳船
木鉢家家飯蒲團處處禪石橋元有路只在暮鐘邊

送朱知事

惆悵官亭酒如何送客頻水烟魚市晚花氣野橋春
小騎行沙健輕衫映柳新尊前莫催別明日異鄉人

送王越

客鄉還送客況是暮春時雨濕花飛重川長鳥度遲
酒

尊歌後歇帆影望中移悵悵東風絮飄零不受吹

別楊三兄弟

憐君好兄弟留宿喜相親隣寺鐘聞早風窻燭剪頻共
傾今夜酒同是異鄉人莫謂相知少交情久見真

荅山西楊孟載憲副

小雨晚晴天新涼欲早眠緣慳盃酒裏愁入髮絲邊北
地先聞鴈西林已罷蟬懸知相憶處千里共蟬娟

歲晚

客途逢歲晚落日倦登臨阻絕山川恨艱難父子心江
吞吳地盡天入楚雲深近報王師捷悲懼不自禁

題得飛雲送劉提司勝

天闊浮雲遠因風捲白衣流陰兼水淨寒影度江微不
受歌聲過先將別思飛飄揚隨去馬今夕定何依

逢俠客

由來燕趙士意氣負平生買妓千金醉平戎一劍行君
王曾錫寵賓客盡知名今日狹邪道相逢重結盟

題田家

田家無別業朝夕理東菑
敢說農功苦惟憂稼穡遲
牧歸牛飽後祭散犬迎時
更得輕徭役豐年樂有期

宿王判簿宅送徐孟岳

來往頻吳越扁舟只載書
言從交後浹情恐別時踈涼
意蓮塘靜宵光竹牖虛懸知待明發
析盡是愁初

寄金子肅

春色邊城暮君如客況何
傷心離母久失意傍人多慰

泛花時酒悲因月夜歌有家歸未得非是隔關河

題杏林圖贈陳子京

茅山無四隣紅杏萬株春收穀還憑虎栽花賸有人學
仙離世久訪病出山頻我獨懷芳躅君能繼後塵

東城道中與王守敬張思廉同賦

水郭秋風後尋詩客共過晚鴻將集渚風葉盡隨波野
客便詩思潭魚識棹歌前山青數點不似亂雲多

同高記室訪虎丘瞻苞二上人

林下曾相見重來記往年笑談俱是法去住本無緣山
溜泉通脉簾陰竹護烟暫忘人世事得此共棲禪

送唐處敬赴嘉興

莫謾唱陽關愁多湖上山春風催去艇酒色解離顏路
出三江外程淹一日間官亭車馬散俱是送君還

次韻答楊孟載池閣晚坐

四首

獨坐面萍池微涼汎碧漪意緣多病懶詩是苦吟遲孤
柳風難定叢篁雨不歇蕭閒此中趣未信鬢如絲

其二

晚涼池閣靜
藹藹綠陰交
野燕將新子
牆桑發舊苞
樂房因雨閉
茶臼待晴敲
誰念孤吟客
繩床坐岸坳

其三

閣晚飈初歇
池萍水不漪
衆禽鳴未定
獨鶴宿常遲
無悶杯仍酌
多眠枕屢欹
黃梅時節裏
常是雨絲絲

其四

習靜消微恙
驚時念故交
花殘紅剩萼
蕉長綠成苞
茶

器晚猶設歌壺醒不敲遙知涼思足行樂到林坳

答宋仲溫見過不遇之作

樵蹤空枉問值此掩重扉餘雪寒猶在初陽曉尚微隣
遙雞獨唱厨靜雀羣飛愧乏應門者留君待我歸

次韻高季迪期遊雲岩雨阻之作

身勢兩無妨閒情獨未忘相期移酒艇同宿過僧房節
物寧長好園花已罷芳亂山烟雨外欲望失蒼蒼

秀野軒

何處問幽尋
軒居湖上林
竹陰看坐釣
苔跡想行吟
嶂日斜明牖
渚風涼到琴
相過有隣叟
應只閒話心

和高二啟聞隣家琵琶之作

花暗短垣春
琵琶度隔隣
促絃知改調
停撥似要人
得見情應眷
遙聽思已親
摧藏曲中怨
何事話能真

喜高記室了上人見過

晨起掃閒齋
涼風葉滿階
吟邀隣友和
坐喜野僧偕
雨意宜深竹
庭陰得古槐
清樽常自滿
能不寫幽懷

送易架閣

何處唱離歌前湖一棹過日斜山似近水落渚偏多寒
意歸沙柳秋風到浦荷不知今夜夢還隔幾烟波

送王團練赴邊

遠塞頻經擾重煩團練行堠兵傳敵信關吏說邊情月
黑深防檄風高屢按營羽書聞近息喜復見秋成

丁未年人日

人日轉寒深春城澹澹陰殘梅仍故色啼鳥換新音歷

喜逢時看詩多感物吟愁來渾是醉誰道酒能禁

飲櫻桃花下次韻饒參政

西園風雨過今日始知春對酒皆閒客逢花即故人悲
懽情各異醒醉量難均忽酒樽前泪愁多易滿巾

賦得收穀虎贈葛太醫

紅杏子初熟黃斑性久馴卧看收穀器行識問醫人逐
少非營利藏多得瞻貧近聞勾漏縣花似董林春

贈古心上人

已斷鄉山念聊隨雲水緣時時惟禮佛處處即安禪半
偈心曾契三衣體自便遙知明月夜趺坐降諸天

聞高季迪病眼因寄

芳時聞病目幾日卧齋房有女能修藥多人為送方書
吟還不廢夜誦定相妨每到看花處思君詎可忘

待杜二寅不至

春水路西東思君悵望中花花湖上雨歸鳥柳間風雲
影疑飛葢歌聲認短篷蕭條一盃酒此夕向誰同

情空日日花事自年年何處思君切牙營鼓角邊

綠水園燕集

客集金閨彥筵張綠水園池陰夏荷滿日正午葵繁和
曲均歡喜摘詞涉道言欲還惜餘興更為坐前軒

同唐文學肅王校書行訪衍畧二上人留宿真慶
精舍得聞字

僧院城南僻禪林夜見分觀心方有悟演法侶無聞燈
影欺微月簾陰護宿雲偶因來問竹况得此逢君

送李山人還越

舊宅鑑湖陰東歸慰遠心
風帆沙樹杳驛路水雲深
袖有題詩卷囊多賣卜金
翩然自來往應不負山林

呂山人客圓明精舍有贈

遠與家山別來依佛殿
居寄齋頻施米作供贖藏疏
禪處容分榻經餘許看書
暫隨僧結夏出市也應疎

答余左司

南城悵違別北里念周旋
賭墅春同奕聽江雨對眠
詩

憶君處烟雨滿秋蕪

送趙克常歸楚

避地吳門久還鄉楚郡遙開田仍負耒賣藥每携瓢夢
逐歸雲度心同去旆迢到依魚市住飲赴里人招海色
霞生島江聲雨送潮不堪先隴上松栢半蕭條

賦得石井贈虎丘瞻書記

來欵生公室因尋陸羽泉虛泓雲液靜陰甃土花圓竹
引歸香積瓶分供法筵虎跑晴見跡龍伏暖浮涎錫影

五言排律

題王材東里草堂

移家遂成隱，結屋澗東隈。
野客分茶送，隣舟載鶴來。
雲埋琴薦冷，風捲壁衣開。
晚餉磯頭飯，秋吟竹下盃。
余生慕幽賞，到此每遲回。

送人之吳江

垂虹橋下路，此地隔江湖。
沙樹應多橘，寒魚半是鱸。
風將菱唱遠，舟帶夕陽孤。
離別琴三疊，悲懽酒一壺。
不堪

孤亭日茶香小竈烟師心如定水應悟趙州禪

賦鉢送僧道衍

舊日天王獻初因佛祖傳藏龍元有法乞米但隨緣不
受蕭郎擊寧求魏后憐托歸村口寺洗傍石根泉此去
留香積當參飽飯禪

訪衍上人不值次壁間韻

僧院深無地清幽慰客心衆山同晚色孤墅肅秋陰托
興詩頻賦論情酒罷斟開簾知樹杪過竹是溪潯雲靜

明遙望猿哀續短吟秋風空返棹偶此記登臨

送張明府

每喜論文久那堪又送行壺深淹別酒歌短促離程水
驛孤臨渡寒山半隱城潮生知海近木落見秋清明旦
車塵下應看父老迎

送王主簿

路從茗水去萬壑更千巖孤驛愁將別離杯惜重啣鶯
聲賸妓曲柳色學朝衫烟淡緣汀草風將向浦帆明朝

憶君處江上雨寥寥

賦橡斗林韻得車字送朱別駕

棚林前代植第宅昔人居高蔭猶臨野幽叢獨訖墟花
開當夏密子熟過林疎深處惟來鳥收時得賦沮雲霄
千尺近雨露百年餘偶為登臨到因懷別駕車

陪牛進士馮明府宿遂初菴得心字

山中因訪古方外遂幽尋曲逕緣迴澗高標出亂岑
舟留北渚借履過東林野色兼寒色雲陰助夕陰烟波

皆客意猿鳥共閒心風引虛林磬泉流別院琴褰帷蘿
蔓入掃壁土苔侵花韻空禪性松聲學梵音翻經仍用
貝布地不須金小舞堦前鶴微鳴柳外禽鴉昏爭亂集
蛩冷罷孤吟樹影分隣屋秋聲急暮砧平蕪供眺望密
雨值登臨景勝驅塵想形忘泐素襟几筵寒閣靜燈燭
夜窻深肯蓄僧開供芳醪客自斟黃柑來野市紫蟹出
溪潯契合元非舊情親已獨欽知師甘寂靜愧我歎浮
沉明日天涯去何時重盍簪

欽定四庫全書



九郭集
卷四

北郭集卷四

欽定四庫全書

北郭集卷五

明 徐賁 撰

七言律

寄周記室履道

湖波遙帶夕陽低，想得君家住更西。
隔岸衆山晴稍出，當門幽鳥晚猶啼。
酒緣客裏偏能飲，詩到愁邊只謾題。
欲倩歸雲寄離思，如何卻向望中迷。

次高二季迪留別韻

婁江東館

柴門村徑帶溪橋來往因君豈憚遙淺水不波仍漾漾
疎林無雨自瀟瀟檣留夕照人將別江作新寒酒易消
明日秋風重惆悵還將離思托歸潮

送張山人還天平

幾欲求田負舊盟羨君西嶺草堂成每緣種橘多開地
獨為修琴始到城黃葉已先霜降落白雲長在雨餘生
龍門林屋無多遠此去尋幽莫計程

晚過廣福精舍訪傳上人

水陰山色晚依微
松映禪房竹映扉
幽鳥不緣留客語
閒僧方自施經歸
移來片石安茶器
分得孤雲補衲衣
杖屨不嫌頻過共
道心久與世相違

贈醫士呂彥倫和王原吉韻

橘花開處杏陰青
百草吹香覺地靈
貧士願留賒藥券
故人思讀衛生經
玄霜玉臼晴猶濕
華月丹房夜不扃
張緒苦吟仍病肺
乞和熊膽護修齡

送馬敬常縣丞

得南字

樓倚層城擁翠嵐，登高送別思那堪。
雙溪到郡同流北，千嶂連關盡向南。
澹澹水陰雲度渚，蕭蕭荷響雨鳴潭。
尋常不醉臨岐酒，今日因君飲易酣。

待董彥正文學次王守敬主簿韻

旅館江湖苦往來，那堪時節併相催。
雪當臘盡寒纔見，梅在春前凍未開。
野客過期空具黍，山童不語訝停盃。
相思獨坐寒齋晚，禁得邊城鼓角哀。

許將軍墓

鄉人傳有漢將軍南郭橋邊是故墳
印出土中存舊字
碑殘火後失全文
旗捲虎牙空落木
劍埋龍氣只寒雲
當時祕器多榮賜
功業于今恨不聞

病中寄北郭諸友

病中長日惟思睡
家僻因憐寢舍幽
山暗園林多夏蝶
樹荒城郭少晴鳩
藥囊卧具聊重整
酒債詩緣得暫休
卻憶故人居咫尺
可能相過慰深愁

送金子肅

客中相見客中憐
江海知名記十年
歸路正當歸鴈後
送君卻在送春前
迢迢烟水分行棹
浩浩鶯花共別筵
自信平生足游賞
看山重約豈無緣

夜坐次張士行太常韻

練衣入夜更蕭騷
草暗閒堦露漸凋
青鳥音書雲外至
素娥環珮月中搖
醉來猶記題羅扇
夢去曾教聽玉簫
獨坐無端思往事
秋風客館正寥寥

答高季迪期遊雲巖

山中風景綠陰時，但得閒行莫恨遲。
啼鳥猶能知勸酒，餘花應是待題詩。
且將盡日酬登覽，況值頻年在亂離。
晴雨明朝那可定，故人何用預相期。

丁未六月廿八夜作

西風作雨又仍休，臥起園齋夜更幽。
天黑露華涼不下，雲疎河影淡還流。
陰蟲齊響渾忘夏，落葉頻飄預報秋。
亂後俄驚時節異，卻將何計為消憂。

瓊姬墓

館娃宮裏已堪愁況是泉臺閔小丘月冷寶奩無復曉
地空玉鴈不知秋蘿間舊屋僧來往竹下新亭客過遊
不有佳名留郡志誰能識此為停舟

同高季迪過東丘蘭若訪呂志學

路入斜塘始泊舟喜同故友訪東丘知君暫寓當幽寺
念我纔歸自遠州水外高帆沙浦月烟中餘稻墓田秋
臨尊何用多悲感今日相看尚黑頭

送袁伯貞之湖廣

尋常送別自堪憐
君去那能不悵然
客路有蘭知楚地
驛亭多雨憶吳天
離鴻一一風檣外
寒水程程雪嶂前
後夜相思千里隔
江鄉梅柳是新年

過俞幻闇故居

水南別業遠無隣
我獨重來是故人
經榻香燈非舊火
禪房花木自新春
傳心曾嗣高僧法
畫影空留居士身
寂滅不知何可樂
凡情未免為沾巾

過姚大臨寓所

客居龍井古庄前
兵後人家幾變遷
亂世昔來求避地
故鄉今想賦歸田
曾邀霽月看花夜
憶別春風禁酒年
此日重過誰候我
寒烟衰草卻留連

南園廢宅

桂堂傾圯藕池枯
舊徑新移路轉迂
射圃春風誰走馬
歌臺夜月自啼烏
看花尚有閒人到
索酒今無醉客呼
多少侯家盡消廢
如何來此獨踟蹰

張叔芳南澗草堂

浴鵲灣頭舊隱居五峰秀色在庭除
山田曾種仙家玉石室猶藏外史書
雨足澗聲春瀝瀝風平柳影月踈踈
百年文物惟君在結構重來是亂餘

鄭靜思少監山莊

祕書解綬還山日移得全家住白雲
閒裡樵漁教子習老來藥茗賴僧分
雙巖樹合千層綠百嶂霞明五色文
此去石橋原不遠鐘聲只在座中聞

寄衍斯道上人

已知出世萬緣空
誰謂詩窮道亦窮
雙屨徧行黃葉雨
三衣獨坐碧蘿風
荒山泉石皆兵後
古室香烟自定中
愧我遠歸千里客
投閒未得與師同

次韻答陳文度

亂餘得返故鄉居
正謂光生腐草餘
閔已欲悲誰作賦
絕交寧許我為書
行看殘菊知身老
坐對寒鴉愧髩疎
準擬求田成隱計
天於此意可教如

病中寄高季迪

一榻高眠薜荔間，閉門瘦減鏡中顏。
亂來難免心多慮，病久番令夢得閒。
疎雨林花春落競，斜風巢燕晚飛還。
藥爐應候呼兒煮，此外升沉總不關。

錢氏池園燕集得春字

幸存萬死一吟身，燕賞良時豈厭頻。
開到楝花風乍暖，啼殘桑扈雨辭春。
清樽偏解款愁客，短髮空慚對故人。
經此亂離今得見，論情便覺轉相親。

陳允中亂後歸故隴營居見寄奉答

萬事由來信有天
癯儒只合住林泉
藏書自構山中屋
束帶仍耕墓下田
但對老農談亦好
何須漂母識為賢
壯年未斷人間世
且盡平生嫁娶緣

訪馮信卿縣令

來覓幽蹤野水邊
荒村樹裏起新烟
梨花蕭寺哦詩處
春水平湖把酒前
念我身經遷逐在
喜君家值亂離全
當時悵望天涯外
今日翻思始惘然

次韻金子肅卜居

君家茅屋去村西地接河渠水上畦
黃菊遍生風掩戶綠萱新長雪消泥
酒香門客船中送詩好隣僧院裏題
誰道亂離無樂土此鄉還自有安棲

次韻答馮信卿見寄

自愧才疎老澗濱此身非是避風塵
長貧為讀疏經熟多病應同藥裏親
僧惠竹枝輕作杖客分荷葉小裁巾
故人眼底惟君在深喜書來問我頻

寄鄺尚德王汝器

塵世閒身遂兩違
扁舟應是入城稀
看花雨裏宜高屐
穫稻霜餘或短衣
玄鳥年年依屋住
白鷗日日繞門飛
尋君不用重相問
梅子林西竹下扉

哭韓景華教諭

命終萬事亦徒然
辛苦微名五十年
頭白尚嗟彈有缺
家貧信是坐無氈
梨花寒食新墳上
楊葉秋風舊宅前
兩處經過皆草草
一盃未得酹重泉

送王守敬歸淮南

大江北望渺烟波君及歸時奈別何詩卷自添新賦咏
客程還歷舊經過芰荷浦裏人家少漁米鄉中估舶多
謾有一樽相對飲秋風又起棹郎歌

次韻高季迪喜予北歸相訪江渚之作

客裏頻思大樹村歸來還喜舊情存十年夢寐憑詩寄
千里風霜藉酒論江上衣裳冬倍冷竹間窻戶晝猶昏
從今會別非遐遠不學梅花易斷魂

遊張林山

在甫里

偶為尋花到竹西
兩山雲氣接高低
午烟僧舍林塘窅
春野人家草樹齊
水鶴晴時行麥壠
園蜂暖處識蘭畦
自憐遠地歸來後
纔是登臨便感悽

雙頭菊為周孟瞻昆仲賦

籬落花開並蒂黃
相依不是競秋光
情親共冒重陽雨
志傲同凌十月霜
莫道寒英為獨秀
須知晚節有聯芳
譜中異品誰能及
只合題名作掾棠

寄渭僧清遠

自喜幽居接上方
風烟野墅共相望
禪邊梅老知僧臘
經裏蓮芳悟性香
石為彈琴曾作薦
屋緣藏茗別開房
日長何處堪消暑
欲借山中竹下涼

山閣夜坐

山閣巖巖俯下方
望來暝色向蒼茫
岡巒暗失高低勢
星斗平垂遠近光
棲鳥鳴雞經火亂
踈松修竹引流長
相期白日重登此
要及春時覽衆芳

樂善庵訪張山人不過

欲使餘生得遠間重來林下扣禪關
惟聞澗鳥時鳴澗卻訝山人復出山
雨草漸荒幽徑裏風泉仍響古松間
自將吟咏酬終日拚取扁舟載月還

浩師房別李伯章

君今初到我將還離合都從一夕間
草草歡情燈下酒悠悠去夢月中山
秋堂鐘靜催禪定寒榻香來伴客閒
莫怪相逢論行樂壯年無幾髮成斑

送珣楚山還廣濟

一來說法衆皈依雲水無心又復歸處處逢僧留半偈
時時禮佛備三衣齋筵赴徧人緣喜淨業修多世態違
雞罩山前明月夜家徒相候啟禪扉

寄蔣道士

雲鶴飄然去莫親還家猶似異鄉貧已知靜樂軒中夢
無復玄都觀裏春綠簡盡編吟後稿朱符長佩病餘身
近聞屐跡投巖壑終作人間避世人

送重衲住武康楊庵

和王功業太常書額賜禪宮表墓墟香炷四時同佛供
松風百嶂有僧居鼓鐘聲隱高秋外樓閣名存劫火餘
此去封禺山色遠佇看一錫度空虛

崑山道中

鴻鴈天寒儔侶稀秋風遠客獨思歸碧山盡處湘雲續
白水明邊鷺自飛漠漠蘆花迷望眼蕭蕭荷葉慘征衣
此行賴共知心語一棹夷猶竟落暉

登崑山次易九成諸友韻

故舊相違西復東，登臨偶得此時同。
鐘聲響落松陰外，帆影來從海氣中。
山鬼洞寒銷劫火，石僧龕古閉香風。
可憐節屈重陽近，斜日秋明萬葉紅。

次韻高翰林啟喜予見過之作

相逢已似恨來遲，況是秋風欲盡時。
念我身便林下服，喜君家富篋中詩。
清江杳杳曾行路，黃柳蕭蕭舊折枝。
無限樽前雲共鳥，應知此處感離思。

和楊儀曹基舟次邵白懷寄

了無得失歎雞蟲
南北驅馳數載中
奉使子諳天遠近
居閒我識壤西東
畫船河渚高郵驛
茅屋江鄉短褐風
何日歸來讓玉里
雲山談笑一尊同

道場山寺

景物淒涼異昔年
佛宮草樹暗荒烟
千盤日色峯頭轉
百道泉聲石上懸
覺鳥有時酬客語
慈雲何處伴僧禪
莫言樓閣成空想
地勝山靈亦變遷

重遊道場

路入千峰石磴危，經臺香閣但餘基。
僧從離亂居山少，客為登臨出寺遲。
伏虎已無巖下錫，放魚空有竹邊池。
曾聞至治承平日，簫鼓春風過六時。

送彭伯忻僉憲赴河南

題畫

載筆同趨侍從班，曾將翰墨動龍顏。
綉衣又向河南去，玉節新從海上還。
千里舟航通洛水，中原文物入夷山。
當時不得相追餞，謾寄離情畫軸間。



贈隱者次毛伯讓韻

歸隱柴桑計已成行歌曳履作商聲朝廷有詔徵遺逸
刺史無人識姓名山鳥下堦窺飲器野猿移石置棋枰
西風茅屋年年捲惟有黃花不世情

贈趙安道

偶為行春此訪君山園野墅宿晴雲藥田鶴守耕相候
隣屋茶香飲見分林下看花多是杏溪潯拾草始知芸
每聞拚醉消長日誰復來題白練裙

春宮詞

沉沉別院語流鶯驚斷春風夢裏情坐試舞衣因力倦
起臨粧鏡覺愁生餘香細拂芙蓉帳小燕頻窺翡翠旌
不意中官傳喚急侍朝得與殿頭行

藏春軒

溪上幽居小徑斜柳垣長日護春華時時清燕無非酒
處處閒行總是花自有軒窗留景物肯教蜂蝶過鄰家
挑情杏思渾忘卻回首東風不用嗟

題胡玄素畫山居圖

幾度尋幽到澗阿，荒谿峻嶺入烟蘿。
白雲九曲人家少，黃葉千林虎跡多。
試茗就當泉上飲，看花須向酒邊歌。
相逢重憶山中客，獨對新圖奈別何。

九月十六日陳逸人旭訪余蜀山中，明日將還武

塘，因賦此送別。

仲昇

門掩荒山萬木空，獨憐遠客此相同。
黃花興減重陽後，白髮愁多暮雨中。
雙劍不緣悲異國，一盃未易醉西風。

明朝離思知何處秋水遙天有去鴻

寄王校書止仲

他鄉每憶故鄉雲此日還山又憶君
菊老豈堪秋後采猿啼猶似客中聞
風帆漁艇行無次野水寒烟去莫分
不是題詩不相寄孤鴻也自念離羣

園隱圖送方以常

曾聞學圃成高隱今日携書是宦遊
隔屋尚通分溜竄傍溪空覓看花舟
菰葵盡作隣僧供芋栗還憑野老收

後夜月明江上夢應隨歸鶴到林丘

題宋參政記事狀後

江湖閒老七朝臣聖主臨軒屬問頻
殿陛屢曾聽曳履都門誰復繼埋輪
拜官南省推功舊被寵東宮賜翰新
豈料賢郎歸第日上尊空酌九原塵

送王架閣南歸

惟賢

蘭橈暫駐酒停斟
隔浦誰歌送別吟
歸鴈不隨南去客
飛雲猶載北來心
野梅官柳愁相映
暮雨春江思共深

想得慈親倚門久逢山逢水莫登臨

白塔懷古

荒山欲逐鳳飛騫誰構浮圖壓寢園土厚尚封南渡骨
月明不照北歸魂海門有路雙龍去沙磧無潮萬馬屯
莫向風塵重悵望梵王宮殿易黃昏

江西途中寄吳城北郭王李諸友

雨晴沙渚片帆開葭飛花鴈叫哀千里有情思北郭
半年無夢落南臺山遮故國層層出雲押長江片片來

可是宦途吟思惡，強憑尺牘浼清才。

題彭江

遠水殘陽落釣舟，遠村漸見野烟收。
菱歌歸浦家家夕，楊葉驚風樹樹秋。
昨日夢非今日夢，他鄉愁是故鄉愁。
自憐久負山中桂，每向江湖憶舊丘。

登廣州城樓

五嶺南來瘴海深，秋風榕葉尚陰陰。
安期一去家遺鳥，陸賈重來橐有金。
門限虎頭潮上下，城開鴈翅客登臨。

清時不用頻興感萬里惟存向關心

送日本僧

萬里扶桑曉色微
海天空濶去人稀
木盃不用隨潮渡
金策惟應向日飛
去路猶餐中土飯
到家重著故鄉衣
國人應問如來法
帶取西天貝葉歸

答故人楊憲副孟載

憶在并州喜合并
別來兩見歲華更
自知詩裏閒情少
頓覺尊前老態生
桑棗誰家非樂土
雲沙何處是邊城

懷君幾度頻登覽
寒日千山雪正晴

北郭集卷五

欽定四庫全書

北郭集卷六

明 徐賁 撰

五言絕句

題坦率子畫

林屋悶烟蘿歸樵已罷歌獨吟斜日裏誰復此相過

送呂庸南

雪色上征衣雲沙鴈自飛去家千萬里只解送人歸

萱草

翠葉春初解香苞曉尚含東風生百草何爾獨宜男

次衍師韻

偶因故人留不遂林下期遙知看月處為我立多時

送王七隅入郭

江雲載客愁江色未分曙君若回首時莫忘別離處

懷王介休

花落又花開思君酒一盃故山千萬點長向夕陽來

題畫別董仲德

鳥啼溪上雨風碎竹間雲明日東湖上看山又憶君

客夜

客舍臥常早茶餘人各歸獨有榻前燭猶能照解衣

其二

新月出易沒殘葉墜還鳴客中自無寐元不為秋聲

庚戌歲元日立春

首祚欣茲踐新年喜併回簇綵分細菜剪勝學蟠梅

其二

宜春新燕帖正旦頌椒花樂遇重熙日東風改歲華

元宵遇雨

萬燈明不夜鼓吹匝鰲山一雨妬城郭人回盡報顏

題畫

嶼鳥鳴孤影汀蘋淡素香曉來江上樹葉葉是新霜

其二

隔浦秋鴻小當江夕照空扁舟不覺重卻載荻花風

其三

路入桃源近門藏竹戶深孤雲同隱迹老鶴識閒心
六言絕句

徐山人耕漁軒

荷鋪隴頭春雨鳴榔浦口黃昏誰道南陽渭水不似桐
江鹿門

題畫

樵林夜鳴楓葉僧扉寒掩烟蘿夢裏秋山十二不知何

處雲多

其二

竹外閒扉半掩沙邊小
逕斜通流水連朝春雨飛花
昨夜東風

其三

偶過隣家看竹因來僧寺彈琴
寒日山川易晚歸時門掩松陰

其四

雨後山青雲白林深路轉溪迴野客艤舟相待家僮沽酒方來

春江送別圖送松江王尹

行李一琴一鶴扁舟千水千山空醉驛亭官酒春風不解離顏

其二

草色東西客路江聲早晚春潮別後思君何處鳴禽疎雨蘭苔

寫意

看山看水獨坐聽風聽雨高眠客去客來日日花開花落年年

咏情

燕子樓頭初月桃花門外春風腸斷琵琶絃裏愁多懊惱歌中

記夢

夢裏綠陰幽草盡中春水人家昨夜紗窗細雨銀燈獨

照梨花

送別沈德虔

江聲千里萬里客路長亭短亭後夜相思何處蘆花明
月沙汀

墨梅

月落山空人靜夢斷碧窻烟冷暗香何處消沉留得一
梢寒影

其二

素質却嫌脂粉蛾眉淡掃玄霜翰墨玉堂曾侍硯池猶
染餘香

七言絕句

江邊秋柳

畫船憶得渡江濱柳色風光爛熳春今日霜條看漸短
也知不是為行人

陸雲

入洛徒聞擅美談諸王正爾恨相啣獨憐蔡克頻垂淚

難洗當時孟玖讒

婕妤怨

釋罪猶能得賜金
弃捐誠不是君心
重來莫負秋風扇
若在昭陽怨更深

春懷次韻楊署令

長把新詩花下吟
看花誰念少年心
今朝獨到西園裏
杏色桃花懊惱深

其二

柳條處處線毵毵只在離亭便不堪幾度看花并送客
暖風晴雨到江南

有約看杏花答高季迪

雨阻花期可便休明朝也合為春游閒行若待天晴去
只恐花飛人又愁

九月八日菊同高季迪賦

黃菊移來雨後新含香斂色待芳晨今朝相對誰憐我
明日來看曠有人

瓶中插黃白紅菊花

淺白深紅間淡黃重陽已過尚聯芳
莫因顏色分花品
同是秋風一樣香

咏芙蓉送朱仲垣歸越

雨晴送客柳塘西野水芙蓉滿大堤
一路看花何處好
樓船直到若耶溪

次韻答王七隅

處處斜陽木葉飛秋風偏在路人衣
相逢莫問離家日

燕子初來今又歸

舟中聞歌呈張文學

水郭春寒雨渺茫
歌聲何短意何長
隣舟多少南行客
若箇聽來不斷腸

閒行

一作題張靜居畫

草香樵徑多晴蝶
桑老人家有夏蠶
信道綠陰時節好
閒從山北過山南

其二

綠樹黃鸝處處山偶從溪上看雲還人生未許全無事
纔得登臨便是閒

夜坐

夜靜謳聲隔浦聽西巖孤絕障秋冥扁舟獨坐湖天闊
疊疊風漪淡淡星

詠三蟲

螢

龍舟一去汴河東空吐餘光表寸衷此夜不堪秋寂寞

景陽宮闕又西風

蝶

花開心事已蹉跎
每怨春多恨轉多
賴有黃花相慰藉
不知風雨又如何

蟬

愁斷齊奴一寸心
誰知青女怨猶深
長吟莫戀宮前柳
黃葉秋風自不禁

野亭讀書圖

書聲流水共泠泠
落木寒山路隔汀
不是秋來易傷感
夕陽風景似新亭

水仙梅花

每憶松林月下人
卻隨游女漢江濱
陳王若作羅浮夢
不獨當時賦洛神

菊竹梅竹

綠竹黃花共一叢
楚江日照自西風
屈原放逐娥皇香
千古離愁此日同

其二

梅花澹澹自開殘
水國春遲雪未乾
不有竹枝相倚並
如何禁得許多寒

畫馬

拳毛零落暗塵埃
何似春風立仗回
當日外番初進奉
不知傳勅賜誰來

其二

親曾調馬動天顏
看遍東風十二閑
今日寫真圖畫裏

一雙龍駿在人間

其三

立仗歸來出御堤
圍官為解錦障泥
春流芳草無人渡
得向東風自在嘶

雨後慰池上芙蓉

池上新晴偶得過
芙蓉寂寞照寒波
相看莫厭秋情薄
若在春風怨更多

雨館有述

滿磯秋葉草堂閒
窻窻飛鴻淡淡山
風雨不堪空對酒
家僮偏喜得魚還

贈陳相士電岩

驢背西風兩鬢寒
老懷頻藉酒盃寬
道傍亦有新豐客
醉裏逢人莫易看

送客至東遷精舍次董著作韻

竹邊僧舍柳邊池
誰道秋風此別離
今夕扁舟聞鴈處
一燈應讀卷中詩

題亡友葉梓素所作山水

楚材

任昉臺前記別離闔閭城外哭君時
今朝孤館看圖畫
萬水千山不盡思

石屏

白鶴山中采石歸
綺雲翠雨滿春衣
補天千古無遺法
我欲因君問女希

烟柳

烟中柳色重還輕
髣髴時聞百轉鶯
看處不須重悵恨

若教含雨更傷情

壺中緋碧桃花碧謝以梨花補之賦以慰緋桃

准擬春深相並開如何先自委蒼苔憑君不用多愁怨
又有梨花作伴來

晚尋王隅隱居

君住湖南水竹深夕陽孤棹此相尋子規啼散門前柳
漠漠春光淡淡陰

雨中

看花長是惱離心
欲看無花思更深
惆悵西園桃杏樹
花開多半在春陰

午日西菴雨中對榴花

麥寒已過又梅寒
此日端陽獨倚欄
誰道榴花能照眼
斜風小雨不禁看

折花背立二美人圖

女伴今朝出較遲
獨來園裏候多時
對花可是無言說
懊恨春風許自知

其二

綉罷春衫出閣遲
辛夷花下立多時
內園且是無人到
不省含羞怕見誰

和楊署令雜詩

寢齋螢火

微燄還憑腐草生
拂幃透隙似含情
竹風池上雖多見
不及房中照獨明

蜘蛛補網

圓網纔虧補又完幾迴費力繞簷端只愁明日風和雨
未信當空住得安

答楊署令送菜

隙地知君手自栽紺芽紅甲雨中開閒居我亦清齋久
肯折新葵為送來

回文次孟載韻

秋風晚靜木花紅葉落閒堦滿院空樓映月低人寂寂
愁多怕見獨飛鴻

兵婦歸七日夫卒乃抱骨赴水逸其姓名因為之

賦

托身未穩忽成空恩愛都來七日中不遣此身隨骨去
人間水底更誰同

題張來儀懷友詩後

亂前草草別相知亂後風光不盡思惟我與君今日見
不堪來讀卷中詩

其二

重讀潯陽懷友詩衆中多是我相知
秋風落木鄉園外
可有人能為我思

谷高季廸酒醒聞雨

高城月黑罷鳴笳
寢舍風多燭易斜
醉裏歸來忘夜半
雨中驚不似山家

其二

江郭多陰暑到遲
夜涼孤枕怯疎帷
聽風聽雨尋常慣
不似今朝醉醒時

答張來儀見慰喪子順哥

至正丁未八月
廿二

每憶當年夢白炊如今又賦杏傷詩
衆中獨有君相念
知得君曾有此悲

訪柱上人

經院深深久護烟雨中
藥草午涼天古香
室裏人重到
恰似秋風五日前

次韻偶感

三首

新浴蘭湯重理粧
珮聲隱約碧羅裳
尋常不為春風妬

誰信相逢也斷腸

其二

意中已解眼中憐誰道從前不有緣
可惜花時正風雨
相逢只為在樓前

其三

翠袖寒禁夢裏秋玉容不解舊風流
誰知獨客深無意
珍重簫娘莫浪愁

六月見榴花

絳英綠葉闌炎光艷色無多出女牆欲借一枝來照眼
看時恨不在端陽

折蓮子呈孟載

落盡紅衣見綠房折來猶帶水雲香柔絲零落芳心苦
未及秋風已斷腸

棄瓢卧雪

二圖

曾謝人間軒冕榮一瓢何足累高情已知喧寂相忘久
棄擲元非為有聲

其二

空林有雪人猶卧破屋無烟門未開多少洛陽城裏客
如何縣令獨能來

慰吳允堅喪妾

腸斷琵琶曲裏聲綠雲天遠不勝情歸家玉板休輕觸
鸛鵲能呼舊日名

登東臯亭答季迪

夕陽亭上共題詩卻憶西行獨咏時不但寒雲與寒水

楚天無物不成思

東丘蘭若枇杷花

梅未含英菊罷花眼中無物屬詩家
忽來僧舍聞香住卻見花開是枇杷

登白蓮寺閣和彥正季迪見懷

遠煩二子念離深江閣斜陽每對吟
豈料詩中千里客也能來此共登臨

贈杜彥正兒端端

新詩誦得客聽歡體弱尊前學拜難
眉目清妍宛如畫
佳名只合叫端端

見端端有感因呈彥正

貧賤憐君總不知
膝前且得弄佳兒
我來一見偏傷感
千里還家看有誰

江上偶見

潮滿江沙起鷺鷥
雪花淡淡乍寒時
紅衣女子搖船去
唱得新聲似竹枝

贈高季迪幼女定兒

紅衣穿小與身宜對鏡嬌痴學畫眉憐愛莫教看作女
慰人猶勝似無兒

夜卧聞鄰家酒聲呈季迪

雨響槽床滴夜長重門雖閉四隣香近來不是忘醒酒
也學東家吏部郎

同季迪宿丁至剛南軒

踈樹寒蕉綠繞池夜涼雨到便先知我家路遠君家近

能不開懷在此時

黃德讓病後苦吟因賦詩以釋之

不廢詩篇病後身
思花懷月亦勞神
憑君暫歇行吟興
藥具方書正可親

過寧真道觀

處處園亭閉不開
殘筠荒樹總堪哀
閒時好作誰家坐
只向寧真觀裏來

聽歌

纔得聽歌便淚垂眼前不似舊聽時青春多半遭離亂
白髮能消幾度悲

西巖漁翁圖

雲水平生一釣綸扁舟來往楚江濱自燒綠竹炊新飯
誰道烟消不見人

寒食前三日適桐里見梨花

清江行盡有人家汨汨春流漲暖沙已自深忘寒食節
無因此地見梨花

聞鳩

看花幾日喜春晴
布穀無端喚雨鳴
何處聽來最傷感
荒村樹裏兩三聲

東軒芍藥盛開兩日雨阻未得觀及往零落因惋
惜賦之

看栽紅藥向東闌
及到開時未暇觀
今日雨晴重過此
淺紅深紫已凋殘

春暮見山茶有感

宮粉凝脂竹外栽繁華曾見雪中開一枝自有相憐意
留向春深待我來

次韻看花四首

數點飛花覆短莎風光初暖已勝羅連朝不向東園去
紅漸稀疎綠漸多

其二

一枝香雪倚東闌開過清明半已殘若到東風無幾日
凋零也作盛時看

其三

柳葉齊舒荻筴長
陌頭無復踏春陽
強將花瓣都收拾
贏得羅衣幾日香

其四

花隨風信應時開
珍重東君巧剪裁
今日看花人賸有
綠陰惟我獨能來

口號

年豐今已見秋成
到處時聞打稻聲
怪底田家秋社裏

賽神猶自卜昇平

圓明寺會宿次韻別吳校書

經榻多餘為我分閒身且得伴孤雲此來已覺心無事
清夜論詩況有君

寄方山人彞

南園灌園看曉汲東湖開地課春耕一從投刺歸來後
贏得身閒處處行

題謫仙像

鞀鼓聲來已亂離
錦袍脫却恨歸遲
秋風江上長吟裏
不唱清平古調詞

採藥

香朮新參葉長齊
雨時來斲破春畦
歸來閒向泉頭坐
洗淨山中兩足泥

題呂山人所藏馬孝常周履道荆南唱和集後

故友空悲生死異
名州曾托亂離頻
因君重讀荆南集
已憶溪山又憶人

是時履道沒於兵

送王守敬還淮南

長淮路遠思君久得見還歸更不堪未盡平生山水興
到家應是憶江南

月明聽胡琴

檀板朱絃出砑聲停盃齊聽月當楹分明自是涼州曲
不解何人最有情

中秋夜對月有詠

四首

擬將詩酒賞良時久不吟詩思苦遲無酒已辜今夜月

如何容得更無詩

其二

吟詩無伴自無情
滿院涼風月正明
畢竟無詩空懊惱
只將身繞桂花行

其三

幾欲高眠畏夜寒
又思月色起來看
及來看月翻多感
不似眠時意少安

其四

雲漢微明夕雨餘行吟獨自繞階除
今宵若與常年比
月色人心總不如

過王伯時宅

里巷新翻亂後移
喜君住處有軒池
重來已是三年後
竹樹依然似舊時

寄高偶仲

見說海虞峰畔住
禪房鐘磬隔林聞
遙知潭影山光裏
能解題詩獨有君

九日過寧真道觀

數叢黃菊遍亭舉不見南山首重搔
日暮忽來真觀坐
卻從畫裏寄登高

為開元道士題倪雲林畫

聞說仙人去採真山中草木幾回春
開元堂上重來客
猶是當年問道人

十一月一日始見菊花

草草重陽去不知今朝始見菊花枝
莫言籬落秋風老

但得來看未是遲

題楊補之十梅

縹緲仙姝粉黛妍
靜臨寒碧照嬋娟
冰肌亦是鮫房種
不獨凌波有洛仙

右水

瘦木成陰顫晚風
幾隨寒月上簾櫳
橫斜何處看偏好
只在清溪淺水中

右影

新花的蝶更玲瓏
學弄芳妍小礪中
凍蝶寒蜂謾相妬
今年纔得試春風

右嫩

六出爭如五出嘉天孫姑射鬪矜夸總然玉質都相似
若論生香合讓花

右雪

酒熟山家夢裡逢美人別去月明中醉遺綠帶無人拾
吹上花梢颺曉風

右煙

小店荒籬任意開亂依叢棘半蒼苔春時料有何人折
多是匆匆驛使來

右野

分得湘江數葉秋偶因翠羽寄羅浮相看莫說當年夢
二女多情自解愁

右竹

或隨流水或隨風一片西飛一片東何似得沾香額上
艷粧猶說壽陽宮

右落

青丸顆顆葉間藏雨綻微酸刺齒香愛護莫教風擺落
牆頭留取擲裴郎

右實

聞

右十梅欠一候補之

題倪雲林竹

六首

憶君我有淚淋漓正似湘江雨後枝記得秋聲夜同聽

消閒館裏對床時

其二

江鄉處處憶陪遊
見寫湘雲數葉秋
今日仙魂乘鶴去
猶存遺墨動人愁

其三

春江誰唱竹枝歌
春雨瀟瀟傍竹多
欲借淇園一竿玉
桃花磯下釣寒波

其四

出海琅玕翠色新
娟娟春雨洗芳塵
夢迴影落虛窻月
卻怪毫端寫未真

其五

倚窻晝寂自焚香
十日春陰不下堂
幾度吟成微醉後
興來拈筆寫修篁

其六

不見高人倪幼霞
流傳遺墨尚清華
鳳毛零落湘江水
春雨新稍整復斜

雲林畫

久約樵翁共結隣
青山如待早歸人
屋西有箇茅亭子
飽聽松風起澗濱

雪翁海棠

一枝寫出玉容嬌
桃李漫山恨未消
惆悵東闌明月夜
半酣西子貌難描

將往吳興徐行正以詩見送奉酬

二首

自喜吟身得自由
長尋酒伴與詩儔
閒雲流水平生意

金方口乃 卷六
何處山中不可留

其二

春前便作訪君期
春後纔來信是遲
又復別君湖上去
重來應是綠陰時

謝呂山人殊長老送別江南

我自東行君自回
清江小艇逐風開
今宵雪屋懸燈坐
還復臨樽待我來

次韻別王止仲

二首

一度看花一度春東風又過楚江津如何綠水橋頭酒
不醉陽關曲裏人

其二

風風雨雨暗消春楊柳官橋夜掩津不是子規啼欲倦
扁舟知有未歸人

次蜀山別韓文學同杜校書記李逸人莊

夕陽野渡人歸後山館南風客到初可恨同來不同去
煩君為寄故鄉書

次韻張文學見招

落葉柴扉晝不開
小牋相寄手親裁
遙知著屐空山裏
蘿逕孤琴候我來

送呂山人

湖天浩浩白雲秋
鷗鷺飛邊有去舟
行到湖東回首處
春山記取是同游

送張甘白還吳北郭

桃花飛盡柳花飛
三月江南尚臘衣
為問東湖雲共宿

春風此度送人歸

送呂管勾

客情沙柳共依依
隔浦遙山向夕微
送別偶當花落後
傷心元不為春歸

山齋圖

秋水柴門竹外開
堦前片石是琴臺
山中幾夜風連雨
明日還應借屐來

西爽樓圖贈王主簿

幾度登臨托遠思樓中山色意中詩西風又復來看畫
卻憶扁舟送別時

雙溪僧舍聞鶯

綠陰到處有黃鸝僧院山深客聽遲獨恨春風容易老
聽時不及在花時

紫菊

一枝開向小籬東淺白深紅盡飲容只有魏家顏色似
春風秋露不相從

過南垞赴黃德讓招

風暗沙村晚漸平
相邀應得遂閒情
南塘水滿人來少
疎雨寒波一舸行

春日報吳城諸友

小屋林深曲磴幽
鳥情花思兩悠悠
風光滿眼春如許
那得君來此地遊

始聞新蟬

芳草斜陽步遶池
孤蟬忽叫發高枝
去年憶在南山驛

千樹南風亂噪時

四月一日夢孟載自滎陽歸覺後因寄

昨宵兩度夢君歸
相見匆匆語亦稀
聞說歸來秣陵住
未知此信是還非

端午日折榴花與允升幼女鸞鸞

猩血叢叢簇絳裙
一枝雨裏手親分
自知老眼無煩照
乞與鸞鸞插鬢雲

病後行樂至池上

連朝卧病少閒情乍到池邊任意行未信空山人寂寞
綠陰何處不聞鶯

過南山

亂峰幽石遶周迴竹閣蕭然對澗開不與青山有緣者
誰能著屐此中來

允中留宿山齋已而復往令弟允升宅明日賦詩
謝之

別來懷抱事多因草草尊前未易陳既擬相留又還去

也終不似弟兄親

題會仙圖

春風十二燕瑤臺曾與羣仙一見來別後空山流水裏
不知幾度碧桃開

泛南湖有味

沙樹汀蒲綠雨新湖波搖蕩白鷗春不須更覓桃源去
已是人間避世人

自南塢還蜀山途中有作

行盡千山更有山此身幾日在山間
桃花野水溶溶去
鷗鳥汀雲冉冉還

空木

老樹依依澗水隈
荒岩春少只蒼苔
不知過往山中客
誰為傷心吊賦來

過吳氏宅觀梅

荒園火後遍蒿萊
賴有梅花一樹開
祇恐明朝零落盡
春風無復此中來

贈惠上人

高樹空林日下遲
歸雲冉冉鳥差差
知師看盡閒風景
瑤席山中獨坐時

題山果幽禽

秋果垂垂壓樹低
一枝斜出覆荒溪
幸無童豎來樵摘
容得山中野鳥棲

暮春

棟花零落曉溪津
節物無情不戀人
二十四風看已盡

等閒觴酒過青春

題林下燒笋

石火初敲竹下來長鑊手自斲荒苔為收殘箨燒新笋
更薦春泉茗一盃

雨中聞黃鸝

高樹重重覆酒臺黃鸝飛遶不驚猜暖風晴日尋常到
誰為多情雨亦來

宿水西客館呈二陳助教

野性從前與世違
那堪習懶又多時
忽來郭裏聞鐘鼓
始信山中臥起遲

贈明月因長老

少留髭髮伴蒼顏
爛熳高情詩酒間
自是諸天歡喜像
世緣不盡未還山

上菁山尋王張二山人不值

此日尋君竟不逢
閒行直到最高峰
歸時已是斜陽後
惆悵荒山寺裏鐘

寄佺講師

荒村古寺無人到，獨愛軒窗水次開。
池上風光看不盡，蓮香纔過桂香來。

陳允中以病不赴約獨還因贈

遠路知君抱病還，高才雖屈喜身閒。
相尋正值重陽日，爛醉秋風九里山。

山中留別張靜居

訪水尋雲幾日閒，君仍留此我先還。
到家已是斜陽後，

身在東湖卻望山

山行

千嶂松風百嶂雲
春山行遍此尋君
林園花盡逢人少
賴有鶯聲到處聞

過山中廢寺

一榻高懸綠嶂前
窻扉掩映碧蘿烟
登臨未免傷懷抱
閒與山僧說世緣

送趙卿之杭州

何處歌聲怨別離夕陽亭上送君時
南風似為行人惜
欲使扁舟逆上遲

送張景則歸天台

剡江東去有名山路遶天台
鴈宕間我未得遊空惆望
是君鄉里喜君還

聞鴈寄郡城諸公

風餘殘燭伴離思幾度懷歸謾作期
寂寞鴈聲山館夜
故人誰念獨聽時

三月廿三日重到蜀山

屋已荒蕪花自妍重尋隣舊說兵前此山多少人曾住
泉石應同我有緣

舟中聞笛與張文學同賦

何處漁汀晚棹回笛聲似為水雲哀相逢莫怪頻垂淚
曾向梁園聽曲來

曉發秀州

路出雙湖烟樹東舟行長是雨兼風夢回重有離家恨

惆悵春寒此夜中

無錫道中

深林晴葉下風遲
山色迎人似有期
十四年前曾住此
湛公宅裏釣泉時

與丘克莊晚立瓜洲望京口諸山

津頭船發暮潮酣
楚水吳山思不堪
歷問青山是何處
卻從江北望江南

閏七月十五夜作

河帶疎星淡不流露華虫響遍新秋
析聲纔罷砧聲起
總是忘情也自愁

堤邊柳

天寒憶得渡江瀕此日重來客意新
惆悵霜餘一株柳
蕭疎元不為行人

泊楊子橋

秋風楊子橋頭路秋水官船泊未開
此處定知鄉里近
江南山色望中來

揚州

竹西亭下路迢迢騎鶴仙人不可招
秋草秋烟滿城郭月明何處夢吹簫

揚州僧舍見花有感

風遞濃香到水涯幾株桃李映門斜
侯家園圃多荒廢不是僧房不見花

新亭送宣別駕

清尊別酒此相同歌斷新亭柳下風
惆悵歸愁與離思

因君并得過江東

居龍河寺懷高季迪 二首

與君常辦酒家錢共結山盟與水緣
今夜重思舊遊處
一龕閒坐佛燈前

其二

竹下幽泉細細流寺間人去暮烟愁
獨憐千里來京客
腸斷龍河寺裏秋

九月十七日聞鴈寄董莊

晚意秋陰兩不分
渚蘆沙竹護寒雲
鴈聲客裏誰先聽
愁絕惟應我共君

冬至

盡知陽復闌迎新
我獨無家歎此身
兒女一從埋沒後
眼中骨肉是何人

除夜

客舍無人更寂寥
聲傳爆竹隔林遙
幾多時節何堪恨
送卻流年是此宵

次韻楊孟載夢歸

夢歸纔喜覺還悲
長說歸期未有期
莫怪燈前重垂淚
一千里外對眠時

聽笛

雨映涼天晚更新
笛聲隱約在東隣
眼中多少飄零客
誰是梁園曲裏人

其二

笛裏新翻曲譜新
餘聲掩抑散遙隣
聽來我最思鄉切

不獨山陽作賦人

送顧謹中還吳

埜店風花傍客飛
尊前長是淚沾衣
相逢相別俱零落
君向江南我未歸

送陳知縣赴寧遠

七十人中曾擢桂
四千里外獨之官
已知游宦非常別
不用匆匆惜去難

送方給事中

南風花滿荔枝林路出湖山百嶂深惟有白雲長在眼
三千里遠寄歸心

送山西謝員外題楊憲副詩後

故人來誦故人詩千里秋風致遠思回首太行何處是
亂山紅葉鴈來時

送葉知縣

黃葦丹楓葉落時水雲漠漠鴈來遲秋風長是身為客
已自傷心况別離

題蔣習之春歸得意圖

簪筆親當白玉墀
天顏有喜獨能知
歸來匹馬花盈路
正是春風得意時

贈客

君歌掩抑有餘情
我欲酬君唱未成
不向江湖諳寂寞
如何知有斷腸聲

題畫有感

上有高楊張王諸友詩

幽禽相對弄芳春
嫩竹分梢露葉新
偶看畫圖懷故舊

眼前無幾白頭人

滁州西澗

渡連西澗草還生六月黃鸝幾個鳴為憶風流常刺史
也曾來此澗邊行

題羊士觀家山水

關武坊中舊草堂鴛鴦湖上好風光四千里路來相覓
謾說楊州是故鄉

題冬青十二紅圖

上有高楊諸友作

秋風吹老萬年枝
山鳥飛來啄子時
卻憶題詩畫中客
一成沒後一分離

廣州雜詠和劉主事子高

魴魚潮退餘溪滷
牡礪墻高結海沙
紅豆桂花供釀酒
檳榔萋葉當呼茶

有云此非本詩

其二

遶門龍眼樹森然
香蠟時來海外船
木屎蒲葵已成俗
紅蕉丹荔不論錢

過庾嶺

盤紆危磴費攀躋
烟嶂連雲去漸迷
可是行人行不得
青山到處鷓鴣啼

寓舍燕

燕子飛來日幾遭
又從窗外立花梢
分明探得人心意
方敢啣泥補舊巢

渡彭蠡至星子灣

水天空濶片帆征
風穩波平也自驚
鎮日取程纔近岸

廬山五老又來迎

沅湘道中


落日荒烟野水濱
鷓鴣啼處有行人
東風記取沅湘道
蘭葉蘭花一路春

宿五溪聞舟中客歌

楓葉林邊有泊舟
夜深風雨總成秋
年來自是頻為客
一度聽歌一度愁

徐溝道中與叔謙相失明日因寄

齊得庭中假寐時馬蹄南北遂參差信知會合原非偶
有意相尋竟失期



北郭集卷六